

Hasil merudum kerana bubu naga

SH 25/5/2022 MS: 15

PENGUNAAN bubu naga yang dikatakan berasal dari negara jiran banyak digunakan sekitar Kedah dan Pulau Pinang.

Bubu dipasang dan dibiarkan di dasar laut bukan sahaja menyebabkan ekosistem laut terancam, malah pendapatan nelayan turut terjejas.

Biar pun penggunaannya telah diharamkan, namun masih ada yang tidak mengendahkan larangan tersebut.

Menurut nelayan, jika dahulu mereka boleh mendapat pendapatan bulanan RM2,000 hingga RM5,00 tetapi kini merudum sehingga RM600.

Menerusi Apa Khabar Rakyat minggu ini, wartawan **SITI ZUBAIDAH ZAKARAYA** menyelami luahan nelayan yang berharap pihak berkuasa mengambil tindakan tegas terhadap isu berkenaan.



Azhar (kanan) dan Abd Manaf melihat keadaan pukut yang digunakan untuk menangkap ikan.



Anggota Penguatkuasaan Maritim Malaysia memeriksa bubu naga yang dipasang di dasar laut oleh pihak tidak bertanggungjawab.

Penggunaan bubu naga yang tidak berkesudahan mengancam ekosistem laut khususnya benih ikan dan hidupan marin, sekali gus menjejaskan pendapatan nelayan.

Nelayan mendakwa, bubu naga yang dipasang dan dibiarkan di dasar laut sepanjang masa membolehkan pelbagai jenis hasil laut termasuk ikan, udang dan ketam tersangkut pada alatan tersebut.

Salah seorang nelayan, Azhar Sudin, 56, bagaimanapun berkata, tindakan itu turut memberi kesan terhadap ikan kecil dan benih ikan yang tidak sepatutnya ditangkap apabila ia turut terperangkap.

“Bagaimana mahu mengatasi masalah ini sebab alatan ini mudah dibeli di mana-mana kedai.

Mereka pasang di dasar laut dan tinggal, setiap tiga atau empat jam, mereka kutip hasil, bubu naga akan terus dibiarkan untuk hasil seterusnya,” katanya.

Menurutnya, biarpun alatan itu telah dilarang penggunaannya, namun masih ada yang menggunakan disebabkan hasil pendapatan boleh mencecah empat hingga lima angka sebulan.

“Disebabkan mahu keuntungan berganda, terdapat nelayan sanggup menukar alatan menangkap ikan kepada bubu naga walaupun mengetahui berdepan tindakan undang-undang,” jelasnya.



ROSHIDI

Bagi Roshidi Jaafar, 62, yang sudah berpengalaman selama 40 tahun sebagai nelayan berkata, disebabkan penggunaan bubu naga semakin mendapat perhatian, ia memberi kesan terhadap pendapatan nelayan sepertinya.

“Mereka guna bubu naga supaya boleh mengaut hasil sampai tiga kali sehari. Tidak kira siang atau malam, mereka sudah berani turun untuk kutip hasil tanpa berselindung. Ini menyebabkan hasil kami berkurang.

“Bila ikan kurang, hasil pun kurang, pendapatan kami terjejas teruk. Dulu boleh dapat RM2,000 hingga RM5,000 sebulan tetapi setelah dikaut oleh mereka yang

menggunakan bubu naga, nak dapat RM600 sebulan pun susah.

“Kalau guna bubu naga, mereka boleh capai hasil sekurang-kurangnya RM10,000 sebulan,” ujarnya.

Seorang lagi nelayan, Abd Manaf Ismail, 55, berkata, pernah berlaku kekecohan akibat ketidakpuasan hati terhadap individu yang menggunakan bubu naga.

Menurutnya, ia disebabkan pukut milik nelayan rosak sehingga mendatangkan kerugian. “Dulu, ada nelayan tidak puas hati sehingga membakar peralatan nelayan kerana marah mereka guna bubu naga,” katanya.

Abd Manaf turut berharap pihak berkuasa melakukan pengawasan lebih ketat agar individu yang melakukan kesalahan dikenakan tindakan sewajarnya.

Masih ada sesetengah pihak guna peralatan dilarang itu untuk kaut keuntungan berganda

SUNGAI PETANI